



MALAYSIA

Warta Kerajaan

SERI PADUKA BAGINDA

DITERBITKAN DENGAN KUASA

HIS MAJESTY'S GOVERNMENT GAZETTE

PUBLISHED BY AUTHORITY

Jil. 67
No. 51

22hb Disember 2023

*TAMBAHAN No. 158
PERUNDANGAN (A)*

P.U. (A) 390.

AKTA INDUSTRI PERKHIDMATAN AIR 2006

KAEDAH-KAEDAH INDUSTRI PERKHIDMATAN AIR (PENDAFTARAN PEMBEKAL) 2023

PADA menjalankan kuasa yang diberikan oleh perenggan 180(m) Akta Industri Perkhidmatan Air 2006 [*Akta 655*], Suruhanjaya membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Industri Perkhidmatan Air (Pendaftaran Pembekal) 2023**.

(2) Kaedah-Kaedah ini mula berkuat kuasa pada 1 Januari 2024.

Tafsiran

2. Dalam Kaedah-Kaedah ini, melainkan jika konteksnya menghendaki makna yang lain—

“badan penilai” ertinya badan pensijilan, pemegang lesen individu, orang yang diberi kuasa, organisasi, badan atau makmal ujian yang diiktiraf oleh Suruhanjaya untuk menjalankan penilaian pematuhan dan mengeluarkan laporan penilaian pematuhan;

“badan pensijilan” ertinya suatu badan pensijilan kompeten yang diiktiraf oleh Suruhanjaya sebagaimana yang dinyatakan dalam kaedah 10;

“pembekal” ertinya pengilang, pengimport atau pengedar sesuatu pemasangan, peranti atau kelengkapan, termasuk ejen atau wakil yang membekalkan atau mengedarkan pemasangan, peranti atau kelengkapan itu kepada mana-mana pengguna, tetapi tidak termasuk peruncit;

“penilaian pematuhan” ertinya proses penilaian dan pengujian yang dijalankan bagi memastikan pemasangan, peranti atau kelengkapan itu mematuhi standard yang diiktiraf;

“pihak berkuasa akreditasi” ertinya Ketua Pengarah Jabatan Standard sebagaimana yang dinyatakan dalam Akta Standard Malaysia 1996 [*Akta 549*];

“sijil pemasangan, peranti atau kelengkapan” ertinya sijil yang dikeluarkan oleh badan pensijilan untuk mengesahkan bahawa sesuatu pemasangan, peranti atau kelengkapan itu menepati standard yang diiktiraf;

“standard yang diiktiraf “ ertinya standard yang diiktiraf oleh Suruhanjaya.

Kelayakan bagi pendaftaran

3. Seseorang itu layak untuk didaftarkan sebagai pembekal jika—

- (a) orang itu ialah suatu syarikat yang diperbadankan di Malaysia; dan
- (b) orang itu memenuhi kriteria yang ditentukan oleh Suruhanjaya dari semasa ke semasa sebagai layak.

Pendaftaran

4. (1) Tiada seorang pun boleh membekalkan sesuatu pemasangan, peranti atau kelengkapan yang berhubungan dengan sistem bekalan air, sistem pemetungan, tangki septik, perpaipan pemetungan dalaman individu atau perpaipan pemetungan dalaman bersama di bawah Akta melainkan jika orang itu telah didaftarkan sebagai pembekal oleh Suruhanjaya.

(2) Seseorang yang tidak mematuhi subkaedah (1) melakukan suatu kesalahan dan boleh, apabila disabitkan, didenda tidak melebihi satu ratus ribu ringgit atau dipenjarakan selama tempoh tidak melebihi satu tahun atau kedua-duanya.

Permohonan pendaftaran dan kelulusan, dsb.

5. (1) Mana-mana orang yang layak di bawah kaedah 3 boleh memohon kepada Suruhanjaya untuk didaftarkan sebagai pembekal.

(2) Permohonan di bawah subkaedah (1) hendaklah disertakan dengan maklumat dan dokumen sebagaimana yang dinyatakan dalam Jadual.

(3) Seseorang pemohon hendaklah membuat permohonan yang berasingan bagi setiap pembekalan pemasangan, peranti atau kelengkapan yang hendak didaftarkan.

(4) Apabila menerima permohonan di bawah subkaedah (1), Suruhanjaya boleh, setelah mempertimbangkan permohonan itu—

(a) meluluskan permohonan itu tertakluk kepada apa-apa syarat; atau

(b) menolak permohonan itu dengan menyatakan alasan penolakan secara bertulis.

(5) Walau apa pun alasan penolakan yang dinyatakan oleh Suruhanjaya di bawah subkaedah (4), pemohon boleh mengemukakan permohonan yang baharu pada bila-bila masa selepas itu.

Sijil pendaftaran

6. (1) Suatu sijil pendaftaran hendaklah dikeluarkan oleh Suruhanjaya bagi setiap permohonan yang telah diluluskan di bawah perenggan 5(4)(a).

(2) Melainkan jika dibatalkan oleh Suruhanjaya di bawah kaedah 9, sijil pendaftaran itu sah bagi tempoh tiga tahun dari tarikh pengeluarannya.

Pembaharuan sijil pendaftaran

7. (1) Pembekal berdaftar boleh, pada bila-bila masa dalam tempoh tiga bulan sebelum sijil pendaftaran itu habis tempoh, mengemukakan suatu permohonan bagi pembaharuan sijil pendaftaran berserta dengan apa-apa maklumat atau dokumen lain yang dikehendaki oleh Suruhanjaya secara bertulis.

(2) Apabila menerima permohonan di bawah subkaedah (1), Suruhanjaya boleh, setelah mempertimbangkan permohonan itu—

(a) meluluskan permohonan itu tertakluk kepada apa-apa perubahan, pembatalan atau pengenaan syarat tambahan; atau

(b) menolak permohonan itu dengan menyatakan alasan penolakan secara bertulis.

Perubahan maklumat pembekal

8. (1) Pembekal hendaklah memberitahu Suruhanjaya secara bertulis, dengan seberapa segera yang mungkin, tentang apa-apa perubahan pada butir-butir pembekal yang diserahkan dalam daftar.

(2) Sebaik selepas pemberitahuan daripada pembekal diterima, Suruhanjaya hendaklah mengemas kini butir-butir pembekal dalam daftar dan sijil pendaftaran.

Penggantungan atau pembatalan sijil pendaftaran

9. (1) Suruhanjaya boleh, melalui notis bertulis, menggantung atau membatalkan mana-mana sijil pendaftaran yang dikeluarkan di bawah Kaedah-Kaedah ini jika—

- (a) pembekal tidak mematuhi mana-mana peruntukan Akta atau perundangan subsidiarinya;
- (b) pembekal tidak mematuhi syarat-syarat yang dikenakan oleh Suruhanjaya menurut perenggan 5(4)(a);
- (c) Suruhanjaya menerima dan mengesahkan apa-apa aduan mengenai pembekal, pemasangan, peranti atau kelengkapan yang dibekalkan oleh pembekal;
- (d) Suruhanjaya berpuas hati bahawa sijil pendaftaran diperoleh secara fraud, salah atau tidak sah;
- (e) apa-apa maklumat atau dokumen, sijil pemasangan, peranti atau kelengkapan, atau laporan penilaian pematuhan yang dikemukakan kepada Suruhanjaya mengandungi kesilapan;
- (f) sijil pemasangan, peranti atau kelengkapan telah digantung atau dibatalkan oleh badan pensijilan;
- (g) laporan penilaian pematuhan telah digantung atau dibatalkan oleh badan penilai;
- (h) pembekal telah berhenti menjalankan perniagaan yang dinyatakan dalam sijil pendaftaran;
- (i) seorang penerima, penerima dan pengurus, pelikuidasi sementara atau pegawai yang sepatutnya telah dilantik mengenai keseluruhan atau sebahagian besar aset pembekal dan pelantikan tersebut tidak dibatalkan atau dirungkaikan dalam tempoh enam puluh hari dari tarikh pelantikan itu;
- (j) pembekal diisytiharkan sebagai bankrap; atau
- (k) telah berlaku apa-apa tindakan atau keingkaran pada pihak pembekal atau terdapat perubahan dalam hal keadaan sehingga pembekal tidak lagi layak untuk didaftarkan di bawah Kaedah-Kaedah ini.

(2) Sebelum Suruhanjaya membuat keputusan di bawah subkaedah (4), Suruhanjaya hendaklah memberikan—

- (a) suatu notis bertulis kepada pembekal mengenai niat Suruhanjaya untuk menggantung atau membatalkan sijil pendaftaran itu; dan
- (b) suatu peluang kepada pembekal untuk membuat penghujahan bertulis dalam tempoh yang dinyatakan dalam notis bertulis itu yang hendaklah tidak kurang daripada empat belas hari dari tarikh notis itu disampaikan kepada pembekal.

(3) Suruhanjaya boleh, sementara menunggu keputusan berkenaan dengan penggantungan atau pembatalan di bawah subkaedah (4), menghendaki pembekal memberhentikan sementara pembekalan pemasangan, peranti atau kelengkapan bermula dari tarikh pengeluaran notis di bawah perenggan (2)(a).

(4) Selepas habis tempoh yang dinyatakan dalam notis di bawah perenggan (2)(a), Suruhanjaya hendaklah, setelah menimbangkan penghujahan bertulis yang dikemukakan oleh pembekal, memutuskan sama ada untuk menggantung sijil pendaftaran itu bagi suatu tempoh yang difikirkannya patut, untuk membatalkan sijil pendaftaran itu atau untuk tidak mengambil apa-apa tindakan yang selanjutnya.

(5) Keputusan Suruhanjaya di bawah subkaedah (4) dan apa-apa tempoh penggantungan, jika ada, hendaklah dimaklumkan kepada pembekal melalui notis secara bertulis.

(6) Penggantungan atau pembatalan sijil pendaftaran itu hendaklah berkuat kuasa pada tarikh yang dinyatakan oleh Suruhanjaya dalam notis bertulis yang diberikan di bawah subkaedah (5).

(7) Jika sijil pendaftaran itu digantung, pembekal hendaklah sepanjang tempoh penggantungan itu—

- (a) berhenti membekalkan pemasangan, peranti atau kelengkapan mulai tarikh penggantungan sijil pendaftaran itu; dan
- (b) mengalihkan atau menarik balik semua risalah, bahan dan iklan mengenai pemasangan, peranti atau kelengkapan yang dibekalkan oleh pembekal.

(8) Jika sijil pendaftaran itu dibatalkan, pembekal hendaklah—

- (a) berhenti membekalkan pemasangan, peranti atau kelengkapan mulai tarikh pembatalan sijil pendaftaran itu; dan
- (b) mengalihkan atau menarik balik semua risalah, bahan dan iklan mengenai pemasangan, peranti atau kelengkapan yang dibekalkan oleh pembekal dalam tempoh tujuh hari dari tarikh pembatalan sijil pendaftaran itu.

(9) Pembekal yang tidak mematuhi subkaedah (7) atau (8) melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya dan boleh juga didenda tambahan tidak lebih daripada lima puluh ringgit bagi tiap-tiap hari kesalahan itu diteruskan selepas sabitan.

(10) Jika sijil pendaftaran digantung atau dibatalkan di bawah kaedah ini, pembekal tidak berhak untuk mendapatkan apa-apa bentuk pampasan atau ganti rugi daripada Suruhanjaya yang berbangkit daripada penggantungan atau pembatalan sijil pendaftarannya.

Badan pensijilan

10. (1) Badan pensijilan yang berikut diiktiraf oleh Suruhanjaya:

- (a) badan pensijilan tempatan yang diakreditasi oleh pihak berkuasa akreditasi;
- (b) badan pensijilan antarabangsa—
 - (i) yang mempunyai tempat perniagaannya di negara selain dari Malaysia dan negara itu telah memasuki suatu perjanjian pengakuan timbal balik dengan Malaysia; dan
 - (ii) yang diiktiraf, didaftarkan atau dilesenkan oleh pihak berkuasa relevan di dalam negara yang badan pensijilan antarabangsa itu menjalankan perniagaannya; dan
- (c) mana-mana organisasi yang diiktiraf oleh Suruhanjaya untuk menjalankan pensijilan bagi pemasangan, peranti atau kelengkapan.

(2) Suruhanjaya hendaklah berhenti mengiktiraf suatu badan pensijilan di bawah perenggan (1)(a) atau (b), jika akreditasi badan pensijilan tempatan itu atau pengiktirafan, pendaftaran atau lesen yang diberikan kepada badan pensijilan antarabangsa itu, dibatalkan oleh pihak berkuasa yang relevan.

Penyingkiran daripada daftar

11. (1) Nama dan maklumat pembekal hendaklah disingkirkan daripada daftar jika—

- (a) pembekal tidak membaharui sijil pendaftaran itu dalam tempoh yang dinyatakan dalam kaedah 7;
- (b) Suruhanjaya membuat keputusan untuk tidak membaharui sijil pendaftaran itu; atau
- (c) Suruhanjaya membuat keputusan untuk membatalkan sijil pendaftaran di bawah kaedah 9.

(2) Jika sijil pendaftaran itu disingkirkan daripada daftar di bawah perenggan 1(a) atau (b), pembekal hendaklah—

- (a) berhenti membekalkan pemasangan, peranti atau kelengkapan mulai tarikh penyingkiran dari daftar; dan
- (b) mengalihkan atau menarik balik semua risalah, bahan dan iklan mengenai pemasangan, peranti atau kelengkapan yang dibekalkan oleh pembekal dalam tempoh tujuh hari mulai tarikh penyingkiran dari daftar.

(3) Pembekal yang tidak mematuhi subkaedah (2) melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya dan boleh juga dikenakan denda tambahan tidak lebih daripada lima puluh ringgit bagi tiap-tiap hari kesalahan itu diteruskan selepas sabitan.

Sijil pendaftaran tidak boleh diserahkan atau dipindahmilikkan

12. Sijil pendaftaran yang dikeluarkan kepada pembekal di bawah Kaedah-Kaedah ini tidak boleh diserahkan atau dipindahmilikkan kepada mana-mana orang.

Tanggungjawab pembekal

13. (1) Seseorang pembekal hendaklah—

- (a) membekalkan pemasangan, peranti atau kelengkapan sepertimana yang telah diluluskan dalam sijil pendaftaran;
- (b) mematuhi peruntukan Akta dan mana-mana perundangan subsidiari yang dibuat di bawah Akta;
- (c) mematuhi syarat-syarat yang dikenakan oleh Suruhanjaya menurut perenggan 5(4)(a);
- (d) memberikan apa-apa maklumat yang dikehendaki oleh Suruhanjaya dalam apa-apa format dan dalam apa-apa tempoh yang ditentukan oleh Suruhanjaya;
- (e) memastikan pemasangan, peranti atau kelengkapan yang dibekalkan mematuhi sepenuhnya standard yang diiktiraf dan apa-apa standard lain yang dinilai melalui penilaian pematuhan, mengikut mana yang berkenaan, pada setiap masa;
- (f) memastikan tiada kemerosotan kualiti pemasangan, peranti atau kelengkapan yang dibekalkan; dan
- (g) mematuhi apa-apa arahan yang dikeluarkan oleh Suruhanjaya dari semasa ke semasa.

(2) Pembekal yang tidak mematuhi subkaedah (1) melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

Pensampelan dan larangan pembekalan

14. (1) Suruhanjaya boleh, pada bila-bila masa melalui notis secara bertulis, menghendaki pembekal untuk menyerahkan dalam masa yang dinyatakan dalam notis itu, sampel pemasangan, peranti atau kelengkapan yang dibekalkan, bagi tujuan pemeriksaan atau ujian.

(2) Jika apa-apa pemasangan, peranti atau kelengkapan itu pada pendapat Suruhanjaya tidak selamat, berbahaya atau mungkin menjadi tidak selamat atau berbahaya, atau tidak sesuai untuk kegunaan dan tujuannya, Suruhanjaya boleh melarang pembekalan pemasangan, peranti atau kelengkapan itu dan mengarahkan pembekal, melalui notis bertulis atau apa-apa cara yang ditentukan, dalam tempoh yang ditentukan oleh Suruhanjaya untuk—

(a) menarik balik pemasangan, peranti atau kelengkapan itu daripada digunakan atau dijual; atau

(b) berhenti membekalkan pemasangan, peranti atau kelengkapan itu.

(3) Jika pemasangan, peranti atau kelengkapan itu didapati cacat selepas pensijilan atau penilaian, Suruhanjaya boleh mengarahkan semua pemasangan, peranti atau kelengkapan yang cacat itu ditarik balik dan kos dan perbelanjaan penarikan balik itu hendaklah ditanggung oleh pembekal.

(4) Pembekal yang tidak mematuhi subkaedah (2) atau (3), melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya dan boleh juga dikenakan denda tambahan tidak lebih daripada lima puluh ringgit bagi tiap-tiap hari kesalahan itu berterusan selepas sabitan.

(5) Suruhanjaya tidak akan bertanggungjawab bagi apa-apa kerugian, kos atau kerosakan yang disebabkan oleh tindakan yang diambil oleh Suruhanjaya di bawah subkaedah (2) dan (3).

JADUAL

[Subkaedah 5(2)]

PENGEMUKAAN DOKUMEN UNTUK PENDAFTARAN SEBAGAI PEMBEKAL

Seseorang pembekal yang memohon untuk didaftarkan sebagai pembekal hendaklah mengemukakan kepada Suruhanjaya—

(a) butir-butir pemohon;

- (b) sijil yang dikeluarkan oleh badan pensijilan berkenaan dengan pemasangan, peranti atau kelengkapan yang mempunyai tempoh sah selama tempoh tidak kurang daripada tiga bulan dari tarikh permohonan bagi pemasangan, peranti atau kelengkapan itu dengan standard yang diiktiraf;
- (c) laporan penilaian pematuhan yang dikeluarkan oleh badan penilai yang mempunyai tempoh sah laku tidak kurang daripada satu tahun sebelum tarikh tamat tempoh bagi pemasangan, peranti atau kelengkapan;
- (d) alamat semua premis yang digunakan oleh pemohon untuk menjalankan perniagaan yang berkenaan dengan pembekalan pemasangan, peranti atau kelengkapan itu; dan
- (e) apa-apa maklumat atau dokumen yang dikehendaki oleh Suruhanjaya dari semasa ke semasa.

Dibuat 15 Disember 2023

[KASA.BAP.(S).700-1/1/1 KLT.3/; PN(PU2)660/Jld. 18]

CHARLES ANTHONY SANTIAGO
Pengerusi Suruhanjaya Perkhidmatan Air Negara

WATER SERVICES INDUSTRY ACT 2006

WATER SERVICES INDUSTRY (REGISTRATION OF SUPPLIER) RULES 2023

In exercise of the powers conferred by paragraph 180(m) of the Water Services Industry Act 2006 [*Act 655*], the Commission makes the following rules:

Citation and commencement

1. (1) These rules may be cited as the **Water Services Industry (Registration of Supplier) Rules 2023**.

(2) These Rules come into operation on 1 January 2024.

Interpretation

2. In these Rules, unless the context otherwise requires—

“assessment body” means a certification body, individual licensee, authorized person, organization, body or testing laboratory recognized by the Commission to carry out conformity assessment and to issue conformity assessment report;

“certification body” means a competent certification body recognized by the Commission as specified in rule 10;